



PRESIDÊNCIA DA REPÚBLICA

KOMUNIKADU BA IMPRENSA

Prezidente Republika Dezmente ho Komunikadu Imprensa Amnestia Internasional Nian.

Dili, 10 Mar (KBI) -Prezidente Republika, Dr Jose Ramos-Horta hato'o ninia klarifikasaun kona-ba komunikadu imprensa ne'ebe fo sai husi Amnestia Internasional iha loron 8 Marsu 2010 ne'ebe hateten katak Prezidente Jose Ramos-Horta oras ne'e fo ona suporta ba Tribunal Internasional kona-ba kazu krime ne'ebe akontese iha Timor-Leste hahu husi tinan 1975 to'o 1999.

“Hau sei ladun fiar katak interese husi vitima sira nian iha hau nia nasaun no dame no demokrasia sei la'o ho diak tebes ho prosesu husi Tribunal Internasional nian.”

Komunikadu Imprensa ne'ebe fo sai husi Amnestia Internasional ne'e, fo sai ho reportajen ne'ebe la los no hakerek ho interpretasaun ne'ebe la hanesan ho diskusaun ne'ebe Prezidente rasik hala'o ho membru Amnestia Internasional nian iha okaziaun ida foin lalais ne'e iha universidade Bradford-Inglaterra.

Komunikadu ne'e la konsege refere mos ba argumentu detalhadu ne'ebe hato'o husi Prezidente Jose Ramos-Horta kona-ba ninia razaun ne'ebe nia hato'o dala barak ona hodi la aseita atu estabese Tribunal Internasional ba kazu ne'ebe akontese iha Timor-Leste.

Prezidente hato'o katak Timor-Leste seidak sai nudar membru Conselho Seguransa, ONU nian, neduni Timor-Leste seidak iha puder hodi fo influenza ba desizaun Conselho Seguransa ONU nian. Iha okaziaun ne'e, Prezidente la hateten katak nia fo suporta hodi estabese Tribunal Internasional ba kazu krime ne'ebe akontese iha Timor-Leste.

Prezidente rasik esplika ho klaru ba membru husi Amnestia Internasional hirak ne'e katak wainhira Conselho Seguransa desidi hodi estabese Tribunal Internasional ruma, nia rasik sei la kontra ideia ida ne'e. Maibe Prezidente rasik sei la hola iniciativa ida ne'e nomos sei la esforsu hodi estabese Tribunal ida ne'e.

Relasiona ho alegasaun husi representante Amnestia Internasional nian balun ne'ebe hateten katak membru Conselho Seguransa balun alega katak prosesu Tribunal Internasional sei la akontese ba kazu Timor-Leste nian tamba Timor-Leste rasik la aseita

prosesu ida ne'e. Prezidente sublinha liu-tan katak membru Amnestia Internasional hirak ne'ebe fo sai alegasaun ne'e, la konsege fo substansia ba sira nia alegasaun ne'e

Iha diskusaun ne'e Prezidente Jose Ramos-Horta deklara katak nia rasik la fiar katak iha membru Conselho Seguransa ONU ida husi parte membru permanente ou non-permanente ne'ebe fo sira nia suporta hodi estabese Tribunal Internasional ba Timor-Leste. Prezidente salienta "Ita bo'ot ho hau hela iha mundu ne'ebe la hanesaan".

Durante ne'e, iha mekanismu rua ne'ebe kria ona hodi hare-ba krime ne'ebe akontese iha tempu pasadu, mak: Komisaun ba Akolhamentu Verdade no Rekonsiliaun iha nivel nasional, no Komisaun Verdade no Amizade ne'ebe estabese hamutuk entre Timor-Leste no Indonezia ne'ebe hala'o ona sira nia knar ho integridade. Timor-Leste no Prezidente la hare katak iha nesesidade hodi estabese mekanismu adisional ruma.

JMP

www.presidencia.tl